

REPUBLIKA E KOSOVËS - REPUBLIKA KOSOVA
KOMUNA E FUSHË-KOSOVËS - OPŠTINA KOSOVO-POLJE
DIREKTORIA E ADMINISTRATËS - DIREKCIJA ZA ADMINISTRIM
Nrfaq/Grat: 780
Datë/Datum: 08.05.2026
KOMUNA E FUSHË-KOSOVËS - OPŠTINA KOSOVO-POLJE



REPUBLIKA E KOSOVËS / REPUBLIKA KOSOVA
REPUBLIC OF KOSOVA



KOMUNA E FUSHË-KOSOVËS / OPŠTINA KOSOVO-POLJE
MUNICIPALITY OF FUSHË-KOSOVË/KOSOVO-POLJE

Datë: 08.05.2026

Komuna e Fushë Kosovës, bazuar në nenin 68, paragrafi 3, të Ligjit për Vetëqeverisje Lokale Nr. 03/L-040 (Gazeta Zyrtare Nr. 28/2008), nenin 17, paragrafi 1, nën - paragrafi 1.2, nenin 19, nenin 21, nenin 22, paragrafi 1, nën - paragrafi 1.2, nenin 28, të Udhëzimit Administrativ të Ministrisë së Administrimit të Pushtetit Lokal Nr. 04/2023 për Administratë të Hapur në Komunë, nenin 17, paragrafi 17.1, shkronja (ç, ë) të Statutit të Komunës së Fushë-Kosovës Nr. 98, të datës 17.08.2012, vendimin e Kuvendit të Komunës Nr. 150, të datës 04.05.2026 shpallë këtë:

NJOFTIM

Për konsultim publik për Projekt-Rregullores për organizimin dhe bashkëpunimin e komunës me fshatrat vendbanimet dhe lagjet urbane në territorin e Komunës së Fushë-Kosovës

Njoftimi për konsultim publik lidhur me 'Projekt-Rregullores për organizimin dhe bashkëpunimin e komunës me fshatrat vendbanimet dhe lagjet urbane në territorin e Komunës së Fushë-Kosovës', është i hapur nga data: **08.05.2026 deri më datën 22.05.2026**.

Projekt-Rregullores për organizimin dhe bashkëpunimin e komunës me fshatrat vendbanimet dhe lagjet urbane në territorin e Komunës së Fushë-Kosovës, është e publikuar në ueb-faqen zyrtare të Komunës së Fushë-Kosovës

Komentet, sugjerimet apo vërejtjet lidhur me projekt-aktin normativ, mund t'i adresoni përmes adresave elektronike si vijon: vildane.latifi@rks-gov.net dhe hasan.gjyrevci@rks-gov.net

Komuna e Fushë-Kosovës e ka paraparë edhe një takim të Konsultimit Publik, i cili do të mbahet me datën: **21.05.2026, me fillim prej orës 14:00h** në Sallën e Kuvendit të Komunës së Fushë-Kosovës.

Me respekt,

Kryetari i Komunës
Valon Prebreza



REPUBLICA E KOSOVËS - REPUBLIKA KOSOVA
KOMUNA E FUSHË-KOSOVËS - OPŠTINA KOSOVO-POLJE
DIREKTORIA E ADMINISTRATËS - DIREKCIJA ZA ADMINISTRACIJO

№faq/№str. 150
Date/Datum: 04.05.2026

KOMUNA E FUSHË-KOSOVËS - OPŠTINA KOSOVO-POLJE



REPUBLICA E KOSOVËS / REPUBLIKA KOSOVA
REPUBLIC OF KOSOVA

KOMUNA E FUSHË-KOSOVËS / OPŠTINA KOSOVO-POLJE
MUNICIPALITY OF FUSHË-KOSOVË, KOSOVO POLJE



Datë: 04.05.2026

Kuvendi i Komunës në mbledhjen e mbajtur me datë 28.04.2026, pas shqyrtimit të parë të 'Projekt-Rregullores për organizimin dhe bashkëpunimin e komunës me fshatrat vendbanimet dhe lagjet urbane në territorin e Komunës së Fushë-Kosovës', të hartuar nga Grupi Punues sipas vendimit të Kuvendit të Komunës Nr. 108, të datës 19.03.2026, të shqyrtuar në Komitetin për Politikë e Financa dhe Komitetin për Komunitete, bazuar në nenin 11, nenin 12, paragrafi 12.2, shkronja (c), nenin 40, paragrafi 40.2, shkronja (a), të Ligjit për Vetëqeverisje Lokale Nr. 03/L-040, (Gazeta Zyrtare Nr. 28.2008), nenin 13, paragrafi 13.6, shkronja (c), nenin 27, shkronja (b), të Statutit të Komunës Nr. 98, ta datës 17.08.2012, mori:

V E N D I M

Për aprovimin në parim për diskutim publik të Projekt-Rregullores për organizimin dhe bashkëpunimin e komunës me fshatrat vendbanimet dhe lagjet urbane në territorin e Komunës së Fushë-Kosovës

1. Për aprovimin në parim për diskutim publik të 'Projekt-Rregullores për organizimin dhe bashkëpunimin e komunës me fshatrat vendbanimet dhe lagjet urbane në territorin e Komunës së Fushë-Kosovës'.
2. Projekt-Rregullorja për organizimin dhe bashkëpunimin e komunës me fshatrat vendbanimet dhe lagjet urbane në territorin e Komunës së Fushë-Kosovës, e cekur në paragrafin një të këtij vendimi, parasheh mënyrën e rregullimit dhe organizimit të lagjeve urbane në qytet dhe fshatrave në territorin e komunës.
3. Pjesë përbërëse e këtij vendimi është 'Projekt-Rregullorja për organizimin dhe bashkëpunimin e komunës me fshatrat vendbanimet dhe lagjet urbane në territorin e Komunës së Fushë-Kosovës'.
4. Kryerja dhe mbikëqyrja e procedurave tjera për zbatimin e këtij vendimi dhe mbajtjen e diskutimeve publike, është në kompetencë të Kryetarit të Komunës dhe Drejtorisë së Administratës.
5. Ky vendim hyn në fuqi 15 ditë pas regjistrimit në zyrën e protokollit në Ministrinë e Administrimit të Pushtetit Lokal, si dhe publikimit në gjuhë zyrtare në ueb-faqën e komunës.

Akti i dorëzohet: Kryetarit të Komunës, Kryesuesit të Kuvendit të Komunës, Drejtorisë së Administratës dhe Arkivës

Kryesuesi i Kuvendit të Komunës

Vlonjat Hasani





Nr. _____ dt. _____ 2026

KUVENDI I KOMUNËS SË FUSHË KOSOVËS

Në bazë të nenin 11, nenit 12, paragrafi 12.2, shkronja (c), nenit 34, paragrafi 34.4 të Ligjit për Vetëqeverisje Lokale Nr. 03/L-040 (Gazeta Zyrtare Nr. 08/2008), Udhëzimit Administrativ të Ministrisë së Adiministrimit të Pushtetit Lokal Nr.02/2019 për organizimin, funksionimin dhe bashkëpunimin e komunave me fshatrat, vendbanimet dhe lagjet urbane, nenin 13, paragrafi 13.6, shkronja (c), nenit 14, nenit 15, të Statutit të Komunës së Fushë Kosovës Nr. 98, të datës 17.08.2012, Kuvendi i Komunës së Fushë-Kosovës në mbledhjen e mbajtur me datë _____ 2026, miraton këtë:

PROJEKT-RREGULLORE

PËR ORGANIZIMIN DHE BASHKËPUNIMIN E KOMUNËS ME FSHATRAT, VENDBANIMET DHE LAGJET URBANE NË KOMUNËN E FUSHË-KOSOVËS

I. DISPOZITAT E PËRGJITHSHME

Neni 1

Qëllimi

Kjo Rregullore ka për qëllim të rregullojë procedurat e formimit, organizimit, strukturimit dhe ndarjen zonale në bashkësi lokale, vendbanimet dhe lagjet në territorin e Komunës së Fushë-Kosovës. Themelimi i këshillave të bashkësive lokale bëhet në bashkëpunim me Komunën e Fushë-Kosovës, duke u bazuar në kompetencat dhe përgjegjësitë e tyre, si dhe duke u siguruar banorëve të fshatrave, vendbanimeve dhe lagjeve urbane realizimin e të drejtave, qasjen në propozime dhe në vendimmarrje për interesin dhe obligimet e tyre qytetare.

Neni 2 Fusha e zbatimit

1. Kjo rregullore zbatohet në të gjitha fshatrat dhe lagjet brenda territorit administrativ të Komunës së Fushë-Kosovës:

- 1.1. **Fshat** - vendbanim rurale brenda territorit të komunës.
- 1.2. **Lagje** - pjesë urbane ose rurale e ndarë brenda një vendbanimi.
- 1.3. **Këshilli i lagjes/fshatit** - organ përfaqësues i banorëve.
- 1.4. Komuna përcakton kufijtë e fshatrave dhe lagjeve.
- 1.5. Emërtimi dhe ndryshimi i tyre bëhet me vendim të kuvendit komunal.
- 1.6. Komuna mban regjistër zyrtar të të gjitha fshatrave dhe lagjeve.

Neni 3 Numri i fshatrave, vendbanimeve dhe lagjeve urbane të Komunës

1. Në Komunën e Fushë-Kosovës vetëqeverisja lokale ushtrohet në nivel të bashkësive lokale, në qytet si lagje urbane dhe në fshatra ose vendbanime, në përputhje me dispozitat ligjore dhe aktet nën-ligjore të komunës.
2. Në pamundësi që në çdo fshat, vendbanim ose lagje urbane të zgjidhet këshilli lokal, atëherë një këshill mund të përfshijë një e më tepër fshatra, vendbanime apo lagje urbane.
3. Komuna e Fushë-Kosovës, në përputhje me UA (MAPL) 02/2019 për organizimin, funksionimin dhe bashkëpunimin e komunave me fshatrat, vendbanimet dhe lagjet urbane, Neni 4, paragrafi 2.5, themelon deri në 25 këshilla lokale të fshatrave, vendbanimeve dhe lagjeve urbane dhe ato janë:

1	Fushë Kosovë I	Lagjia Bresje 1
2	Fushë Kosovë I	Lagjia Bresje II, Lagjia Apollonia
3	Fushë Kosovë II	Qerdhja –Lagjia Stacioni i Trenit Lagjia Kolonia
4	Fushë-Kosovë II	Lagjia Nakarada
5	Fushë Kosovë III	Lagjia 028, Lagjia 029
6	Fushë Kosovë IV	Lagjia Dardania I Rr: Hajrullah Zymi

7	Fushë Kosovë IV	Lagjia Dardania II- Rr: Hajrullah Zymi- Shefki Kuleta
8	Fushë Kosovë IV	Lagjia Dardania III- Rr: Shefki Kuleta -Pajazait Islami
9	Fushë Kosovë IV	Lagjia Eliza, Britania Home
10	Fushë Kosovë V	
11	Harilaq	
12	Sllatinë e Vogël	
13	Sllatinë e Madhe	
14	Bardh i Vogël	
15	Pomozotin	
16	Bardh i Madh	
17	Grabovc i Poshtëm	
18	Lismir	
19	Kuzmin	
20	Henc	
21	Vragoli	
22	Miradi e Epërme	
23	Miradi e Poshtme	

Neni 4

Formimi i Komisioneve nga Kuvendi i Komunës për zgjedhjen e këshillave lokale

1. Në bazë të UA (MAPL) 02/2019 për organizimin, funksionimin dhe bashkëpunimin e komunave me fshatrat, vendbanimet dhe lagjet urbane, Neni 5, paragrafët 1, 2 dhe 3, Kuvendi i Komunës emëron një Komision për të udhëhequr dhe koordinuar punën në terren në zgjedhjen e këshillave lokale. Kuvendi i Komunës emëron një komision prej 7 (shtatë) anëtarëve në këtë përbërje: 4 (katër) anëtarë nga Kuvendi i Komunës nga subjektet e ndryshme politike, 1 (një) nga ekzekutivi, 1 (një) anëtar nga shoqëria civile dhe 1 (një) nga përfaqësuesit e fshatit, vendbanimit apo lagjes urbane që përcaktohet aty për aty nga tubimi dhe i cili njëkohësisht është bashkëkryesues i tubimit.

2. Komisioni duhet të reflektojë përfaqësimin gjinor (dhe etnik nëse aplikohet). Përbërja e komisionit duhet të përfaqësojë përbërjen e subjekteve politike me numër më të madh të anëtarëve të përfaqësuar në Kuvendin e Komunës. Kryesuesi i komisionit zgjidhet me shumicë votash të anëtarëve prezentë në mbledhje.

Neni 5

Përgjegjësitë e Komisionit të Kuvendit të Komunës

1. Komisioni i emëruar nga Kuvendi i Komunës duhet të jetë përgjegjës për caktimin e periudhës kohore të mbajtjes së tubimeve/dëgjimeve/takimeve me qytetarë, për zgjedhjen e anëtarëve të këshillave lokale dhe kryetarëve të këshillave lokale të fshatrave, vendbanimeve dhe lagjeve urbane.
2. Komisioni i emëruar nga Kuvendi i Komunës, nëpërmjet Zyrës për Informim, informon qytetarët 7 (shtatë) ditë para datës së mbajtjes së tubimit me qytetarë për zgjedhjen e këshillave lokale përmes:
 - 2.1. Shpalljeve publike, të vendosura në objektet publike dhe vendet më të frekuentuara brenda territorit ku mbahen tubimet ku do të zgjidhen këshillat lokale;
 - 2.2. Mediave lokale;
 - 2.3. Ueb-faqes zyrtare të Komunës; dhe
 - 2.4. Rrjeteve sociale; etj.
3. Njoftimi publik domosdo duhet të përmbajë:
 - 3.1. Rendin e ditës;
 - 3.2. Datën;
 - 3.3. Kohën;
 - 3.4. Vendin e mbajtjes së tubimit.
4. Komisioni i raporton Kuvendit të Komunës për procesin zgjedhor.
5. Mandati i Komisionit përfundon me mandatin e Kuvendit të Komunës.

Neni 6

Formimi i këshillave lokale

1. Këshilli lokal i fshatit, vendbanimit apo lagjes urbane do të ketë 5 (pesë) deri në 9 (nëntë) anëtarë, varësisht nga numri i banorëve. Numri i saktë i anëtarëve për secilin këshill, përcaktohet nga vetë banorët e fshatit, vendbanimit apo lagjes urbane që janë prezentë në tubimin zgjedhor.
2. Këshilli duhet të përfshijë përfaqësimin e çdo fshati, vendbanimi apo lagje urbane. Përbërja e këshillit lokal duhet të reflektojë përbërjen etnike dhe gjinore. Në rast se në fshat, vendbanim apo lagje urbane jetojnë pjesëtarë të komuniteteve jo-shumicë, nëse marrin pjesë në tubimin zgjedhor, ata duhet të jenë të përfaqësuar në këshillin lokal.
3. Përzgjedhja bëhet përmes votimit të fshehtë në tubimin me qytetarë, përveç nëse këshilli vendos ndryshe. Të drejtë vote kanë të gjithë banorët e fshatit, vendbanimit apo lagjeve urbane përkatëse mbi moshën 18 vjeçare.
4. Kandidatët për kryetarë dhe anëtarë të këshillave lokale duhet të jenë banorë të përhershëm në atë lokalitet.
5. Tubimet publike mbahen së paku 2 (dy) herë në vit. Komuna siguron informim të rregullt për vendimet dhe projektet.
6. Tubimin publik e hap Kryetari apo njëri nga anëtarët e Komisionit të Kuvendit të Komunës, që e ndihmon në bashkë-kryesim përfaqësuesi i fshatit, vendbanimit apo lagjes urbane që përcaktohet aty për aty, i cili njëkohësisht është edhe anëtar i Komisionit të Kuvendit të Komunës.
7. Këshilli lokal i fshatit, vendbanimit apo lagjes urbane zgjidhet me mandat katërvjeçar (4).

Neni 7

Kriteret e përzgjedhjes për këshilla lokale

1. Kandidatët për pozita të anëtarëve të Këshillit lokal duhet të kenë mbushur 18 vjet në ditën e organizimit të zgjedhjeve për themelimin e këshillave lokale, të jenë banues të atij fshati, vendbanimi apo lagjeje urbane, si dhe të gëzojnë integritet të lartë moral dhe të kenë reputacion të mirë në komunitetin e tyre.

2. Kandidatët për pozitën e Kryetarit të Këshillit lokal nuk mund të kandidojnë nëse janë të zgjedhur apo të emëruar në poste udhëheqëse në strukturat e subjekteve të partive politike.
3. Për anëtarë të këshillave lokale të fshatrave, vendbanimeve apo lagjeve urbane zgjidhen kandidatët të cilët fitojnë numrin më të madh të votave nga numri i përgjithshëm i banorëve të fshatit, vendbanimit apo lagjeve urbane me të drejtë vote që janë prezentë në tubimin zgjedhor, dhe me atë rast duhet të respektohet përfaqësimi gjinor/etnik në strukturën e këshillit.

Në rast se dy ose më shumë kandidatë kanë vota të barabarta, atëherë zhvillohet raundi i dytë i votimit. Kandidati që fiton shumicën e votave zgjidhet anëtar.

4. Për anëtarë të këshillave lokale të fshatrave, vendbanimeve dhe lagjeve urbane, nuk lejohet të jenë më shumë se një anëtar i familje së ngushtë.
5. Kryetari i Këshillit lokal është njëkohësisht edhe anëtar i Këshillit lokal.
6. Tubimet zgjedhore kanë legalitet dhe legjitimitet juridik, nëse në tubime janë të pranishëm si në vijim:
 - 6.1. Në fshatra, vendbanime dhe lagje urbane ku numri i banorëve është nga 100 deri në 1000, pjesëmarrja duhet të jetë së paku 5 anëtarë të këshillit;
 - 6.2. Në fshatra, vendbanime dhe lagje urbane ku numri i banorëve është nga 1001 deri në 10000, pjesëmarrja duhet të jetë së paku 7 anëtarë të këshillit;
 - 6.3. Në fshatra, vendbanime dhe lagje urbane ku numri i banorëve është nga 10001 deri në 25000, pjesëmarrja duhet të jetë së paku 9 anëtarë të këshillit;
 - 6.4. Në fshatra, vendbanime dhe lagje urbane ku numri i banorëve është mbi 25000, pjesëmarrja duhet të jetë së paku 9 anëtarë të këshillit.

Neni 8

Ndërprerja dhe pushimi i mandatit të anëtarëve dhe kryetarëve të këshillave lokale

. Në rastet kur qytetarët konsiderojnë që ndonjë nga anëtarët ose Kryetari i këshillit lokal nuk i kanë përmbushur obligimet që dalin nga kjo Rregullore, anëtari dhe Kryetari i këshillit lokal mund të shkarkohen me shumicë (50% plus 1 votë) të votave të banorëve me të drejtë vote të fshatit, vendbanimit apo lagjes urbane.

2. Në mënyrë që të bëhet ky votim, kërkohet një peticion për ndërprerjen e mandatit që duhet të nënshkruhet nga banorët e fshatit, vendbanimit apo lagjes urbane. Ky peticion duhet të mbledhë nënshkrimet e më shumë së gjysmës së numrit të pjesëmarrësve nga takimi ku është zgjedhur këshilli lokal. Komuna, respektivisht Komisioni Komunal duhet të lajmërohet paraprakisht për një mbledhje të tillë.

3. Në rastet kur këshilli lokal shkarkohet si tërësi (anëtarët e këshillit dhe kryetari), një votim i ri duhet të bëhet menjëherë në bazë të procedurave të nenit 6 dhe 7 të kësaj Rregulloreje, në mënyrë që të zgjidhet këshilli i ri lokal dhe kryetari.

Neni 9

Përfundimi i mandatit dhe zëvendësimi i anëtarëve dhe kryetarëve të këshillave lokale

1. Mandati i kryetarit dhe anëtarëve të këshillave lokale përfundon:

- 1.1. Me përfundimin e mandatit;
- 1.2. Nëse jep dorëheqje;
- 1.3. Nëse ndërrohet vendbanimin;
- 1.4. Nëse shkarkohet;
- 1.5. Në rast se dënohet për vepër penale me një urdhër për burgim prej 6 muajsh ose më tepër;
- 1.6. Nëse përfshihet në strukturat udhëheqëse të subjekteve/partive politike; dhe
- 1.7. Nëse vdes.

2. Në rast të humbjes së mandatit të Kryetarit të këshillit, komisioni komunal brenda 30 (tridhjetë) ditësh duhet të organizojë zgjedhjet për zgjedhjen e Kryetarit të ri.

3. Zëvendësimi i anëtarëve të këshillave lokale në rastin e humbjes së mandatit apo zgjedhjes së tij kryetar i këshillit sipas paragrafit 2 të këtij neni, bëhet nga lista e pritjes me aprovimin e Komisionit të Kuvendit të Komunës brenda 15 (pesëmbëdhjetë) ditësh. Ndryshimet në përbërje të këshillave lokale duhet të publikohen në ueb-faqen e komunës pas miratimit të vendimit nga Kuvendi i Komunës.

Neni 10

Mbajtja e procesverbaleve në tubimet me qytetarë

1. Në të gjitha tubimet me qytetarë në lidhje me zgjedhjen apo shkarkimin e këshillave lokale dhe kryetarëve të këshillave, mbahet procesverbal.
2. Procesverbali nga tubimi me qytetarë përmban: emrat dhe mbiemrat e anëtarëve të Komisionit Komunal që udhëheqin dhe koordinojnë punën në terren për zgjedhjen e këshillave lokale, të zyrtarëve komunal, listën e pjesëmarrësve (qytetarëve) që kanë marrë pjesë në tubim duke

përfshirë emrin, mbiemrin, të dhënat për zgjedhjen e këshillit lokal duke përfshirë emrat e kandidatëve, të dhënat për shkarkimin e këshillit lokal, procedurat e votimit, duke përfshirë emrat e kandidatëve dhe numrin e votave të mbledhura, si dhe çështje të tjera të nevojshme që duhet të shënohen në procesverbal.

3. Procesverbalin e mban një anëtar i Komisionit Komunal i cili organizon tubimin. Procesverbalin e nënshkruajnë kryesuesi i tubimit dhe procesmbajtësi, ndërsa komisioni sipas nenit 3 të kësaj rregulloreje i raporton Kuvendit të Komunës për rrjedhën e tubimeve për zgjedhjen e këshillave të fshatrave, vendbanimeve dhe lagjeve urbane.
4. Procesverbali me të gjitha të dhënat e përmendura në paragrafin 3 të këtij neni publikohet në ueb-faqen e Komunës menjëherë pas tubimit zgjedhor.

Neni 11

Konsultimet ndërmjet Komunës dhe këshillave lokale

1. Kuvendi i Komunës dhe Kryetari i Komunës ftojnë përfaqësuesit e fshatrave, vendbanimeve dhe lagjeve urbane që të marrin pjesë në tubimet publike me qytetarë, në dëgjimet publike për buxhet dhe aktet legjislative, në tubimet e rregullta publike, si dhe në takimet për planifikim strategjik që organizohen nga Komuna, përkatësisht Kuvendi i Komunës ose Kryetari.
2. Së paku kryetari ose një anëtar i këshillit lokal të fshatit, vendbanimit apo lagjes urbane duhet të jetë i përfshirë në të gjitha grupet punuese komunale për hartimin e hartave zonale, planeve zhvillimore dhe rurale, por edhe për projektet infrastrukturore, çështjet e shërbimeve publike dhe prioritetet e investimeve që janë pjesë e lokalitetit ku ata jetojnë.
3. Këshillat lokale kanë të drejtë:
 - 3.1. Të paraqesin kërkesa, propozime dhe ankesa;
 - 3.2. Të japin mendime për projektet dhe vendimet komunale;
 - 3.3. Të kërkojnë organizimin e takimeve konsultative me Komunën.
4. Komuna është e obliguar:
 - 4.1. Të shqyrtojë propozimet e këshillave lokale;

- 4.2. Të japë përgjigje me shkrim brenda afatit prej 15 (pesëmbëdhjetë) ditësh;
 - 4.3. Të informojë këshillat lokale për vendimet e marra.
5. Kryetari i Komunës duhet që së paku të organizojë 2 (dy) takime në vit me udhëheqësit e këshillave lokale. Takimet duhet të mbahen së paku një herë në gjashtë muaj. Për rendin e ditës duhet të konsultohen edhe udhëheqësit e këshillave lokale.
 6. Kuvendi i Komunës mund të kërkojë një opinion nga këshilli lokal i fshatit, vendbanimit apo lagjes urbane në çështje të caktuara me interes për komunitetin.

Neni 12

Bartja e aktiviteteve nga Komuna tek këshillat lokale

1. Me kërkesën e këshillit lokal dhe propozimin e Kryetarit të Komunës, Kuvendi i Komunës me vendim mund të bartë disa detyra dhe përgjegjësi për t'i ushtruar këshillat lokale të fshatit, vendbanimit dhe lagjes urbane, me qëllim të rritjes së efikasitetit, pjesëmarrjes qytetare dhe [përmirësimit të shërbimeve në nivel lokal](#).
2. Aktivitetet që mund të barten përfshijnë, por nuk kufizohen në:
 - 2.1. Organizimin e aktiviteteve komunitare dhe kulturore;
 - 2.2. Mirëmbajtjen bazike të hapësirave publike (parqet, rrugët lokale, ndriçimi publik në nivel raportimi dhe mbikëqyrje);
 - 2.3. Identifikimin dhe raportimin e nevojave të komunitetit;
 - 2.4. Bashkëpunimin në realizimin e projekteve të vogla infrastrukturore;
 - 2.5. Ndërmjetësimin ndërmjet qytetarëve dhe Komunës.
3. Bartja e aktiviteteve bëhet përmes vendimit të organit kompetent të Komunës dhe marrëveshjes së bashkëpunimit me këshillin lokal përkatës.
4. Marrëveshja duhet të përmbajë:
 - 4.1. Përshkrimin e aktiviteteve të bartura;
 - 4.2. Afatet e realizimit;
 - 4.3. Përgjegjësitë e palëve;
 - 4.4. Mënyrën e financimit dhe mbështetjes logjistike;

4.5. Mekanizmat e raportimit dhe mbikëqyrjes.

5. Komuna obligohet të sigurojë mbështetje financiare dhe teknike për realizimin e aktiviteteve të bartura, në përputhje me buxhetin e miratuar.
6. Këshillat lokale janë të obliguara:
 - 6.1. Të zbatojnë aktivitetet në përputhje me ligjin dhe marrëveshjen;
 - 6.2. Të raportojnë rregullisht për progresin dhe shpenzimet;
 - 6.3. Të sigurojnë transparencë dhe përfshirje të qytetarëve.
7. Komuna ka të drejtë të mbikëqyrë dhe të vlerësojë realizimin e aktiviteteve dhe, në rast të mos zbatimit ose keqpërdorimit, të pezullojë ose të revokojë bartjen e tyre.
8. Çdo bartje e aktiviteteve nuk e përjashton përgjegjësinë përfundimtare të Komunës për ofrimin e shërbimeve publike.

Neni 13

Roli, detyrat dhe përgjegjësitë e këshillave lokale

Këshilli lokal i fshatit, vendbanimit apo lagjes urbane duhet të takohet së paku 4 (katër) herë brenda vitit për të shqyrtuar çështjet në interes të lokalitetit, si dhe harton dhe miraton planin e punës së këshillit dhe rregullat e brendshme të funksionimit.

1. Këshilli lokal i fshatit, vendbanimit apo lagjes urbane organizon, përcjell dhe planifikon planet dhe programet zhvillimore të lokalitetit në të gjitha sferat, në bashkëpunim me Kuvendin e Komunës, Kryetarin e Komunës, komitetet dhe drejtoritë komunale.
2. Këshilli lokal i fshatit, vendbanimit apo lagjes urbane duhet të informojë Komunën së paku 7 (shtatë) ditë më herët për kohën dhe agjendën e takimeve. Zyrtarët komunalë nga fushat përkatëse mund të marrin pjesë në takimet e organizuara nga këshillat lokale. Takimet e qytetarëve mund të organizohen me iniciativën e këshillit lokal të fshatit, vendbanimit apo lagjes urbane.
3. Këshilli lokal mund të ndërmarrë aktivitete të cilat në veçanti ndikojnë në:
 - 3.1. Zhvillimin lokal ekonomik të qëndrueshëm të lokalitetit;

- 3.2. Planifikimin urban dhe rural të lokalitetit;
 - 3.3. Mbrojtjen e mjedisit lokal të lokalitetit;
 - 3.4. Ndhimën në rritjen e efikasitetit në ofrimin e shërbimeve publike komunale brenda lokalitetit;
 - 3.5. Sigurimin e të dhënave elementare për çdo familje të lokalitetit përkatës, përcjelljen e gjendjes së tyre ekonomike, sociale dhe dhënien e rekomandimeve, propozimeve për mbështetje të këtyre rasteve;
 - 3.6. Ndhimën në mirëmbajtjen e varrezave dhe hapësirave publike të gjelbëruara;
 - 3.7. Zhvillimin e turizmit;
 - 3.8. Organizimin e aktiviteteve kulturore e sportive;
 - 3.9. Bashkëpunimin me organet e Komunës dhe organizata të tjera të shoqërisë civile për çështjet me interes për lokalitetin;
 - 3.10. Organizimin e aksioneve vullnetare në interes për lokalitetin; dhe
 - 3.11. Zbatimin e aktiviteteve që janë të bartura, sipas procedurave në nenin 12 të kësaj rregulloreje.
4. Këshillat lokale mund t'i parashtrajnë Kuvendit të Komunës dhe Kryetarit pyetje me shkrim për çështje të ndryshme në interes të lokalitetit, dhe brenda afatit prej 30 (tridhjetë) ditësh organet e Komunës duhet t'i përgjigjen këshillit lokal.

Neni 14

Roli i kryetarëve të këshillave lokale

1. Kryetari/ja i/e këshillit lokal përfaqëson fshatin, vendbanimin apo lagjen urbane në konsultimet dhe diskutimet me Kuvendin e Komunës dhe Kryetarin e Komunës.
2. Kryetari i këshillit lokal thërret dhe udhëheq mbledhjet e këshillit lokal dhe kujdeset për organizimin dhe punën e këshillit lokal. Po ashtu, ai/ajo nënshkruan konkluzionet e takimeve, propozimet dhe prioritetet e miratuara nga ana e këshillit lokal dhe është i obliguar që në afat prej 15 (pesëmbëdhjetë) ditësh nga dita e miratimit të tyre t'i dorëzojë tek organet komunale përmes Sekretarisë së Kuvendit.

Neni 15
Financimi i aktiviteteve

1. Financimi i aktiviteteve të këshillave lokale mund të bëhet nga vetë banorët e fshatit, vendbanimit apo lagjes urbane, nga Komuna, nga financimi i përbashkët, si dhe nga donatorët, në pajtueshmëri të plotë me Statutin e Komunës, rregulloret komunale dhe legjislacionin e zbatueshëm në Republikën e Kosovës për menaxhimin e financave publike.
2. Këshilli lokal bën raporte gjashtë mujore dhe vjetore të mjeteve të inkasuara, si dhe të atyre të shpenzuara, dhe i bën ato transparente për qytetarët e atij lokaliteti, si dhe për Kuvendin e Komunës dhe Kryetarin.

Neni 16
Kompensimi i këshillave lokale

1. Për punën e tyre, kryetarët e këshillave lokale kompensohen nga buxheti i Komunës.
2. Kompensimi për kryetarët e këshillave lokale duhet të jetë ekuivalent me shumën e kompensimit të anëtarëve të komiteteve obligative.
3. Kompensimi për pjesëmarrje në takime bëhet vetëm për 4 (katër) takime të këshillave lokale të mbajtura gjatë vitit kalendarik.
4. Kompensimi nënkupton që mjetet financiare të shfrytëzohen vetëm për nevoja të funksionimit të këshillit lokal.

Neni 17
Mospërbushja e përgjegjësi

Për të gjitha aktivitetet e bartura në këshillin lokal nga organet e Komunës, këshilli lokal i fshatit, vendbanimit dhe lagjes urbane përkatëse mban obligime dhe përgjegjësi ligjore.

II. DISPOZITAT KALIMTARE DHE PËRFUNDIMTARE

Neni 18

Në rast konflikti të dispozitave të kësaj Rregulloreje me Ligjin për Vetëqeverisje Lokale dhe Statutin e Komunës, mbizotërojnë dispozitat e ligjit dhe të statutit.

Neni 19

Ndryshimet dhe plotësimet eventuale në këtë Rregullore do të bëhen sipas procedurës së njëjtë të aprovimit të kësaj rregulloreje.

Neni 20

Hyrja në fuqi

Kjo rregullore hyn në fuqi 15 (pesëmbëdhjetë) ditë nga dita e regjistrimit dhe vlerësimit të ligjshmërisë nga MAPL-ja, si dhe 7 (shtatë) ditë pas publikimit në ueb-faqen zyrtare të Komunës.

KUVENDI I KOMUNËS SË FUSHË-KOSOVËS

01-Nr. _____, më _____.

KRYESUESI I KUVENDIT

Vlonjat Hasani
